

金匱玉函經

金匱玉函經卷第五

漢仲景張機著

上海陳世傑懷仁堂重校

晉王叔和撰次

門人張邵與有文叅

宋林億等校正

平江余謙牧心恭重校

辨不可發汗病形證治第十三

門人張嵩峻天閱

夫以爲疾病至急。倉猝尋按要者難得。故重集諸可與不可方治。比之三陰三陽篇中。此易見

也又時有不止是三陰三陽出在諸可與不可中也

少陰病脉細沉數病爲在裏不可發其汗

脉浮而緊法當身體疼痛當以汗解假令尺中脉遲者不可發其汗何以故此爲榮氣不足血氣微少故也

少陰病脉微不可發其汗亡陽故也

脉濡而弱弱反在關濡反在顛微反在上澁反

在下。微則陽氣不足。濇則無血。陽氣反微。中風汗出。而反躁煩。澁則無血。厥而且寒。陽微發汗。躁不得眠。

動氣在右。不可發汗。發汗則衄而渴。心苦煩。飲卽吐水。

動氣在左。不可發汗。發汗則頭眩。汗不止。筋惕肉瞤。

動氣在上。不可發汗。發汗則氣上衝心。

動氣在下不可發汗發汗則無汗心中大煩骨
節苦疼目運惡寒食則反吐穀不得前一云穀不消化
咽中閉塞不可發汗發汗則吐血氣微絕手足
逆冷雖欲踰臥不能自溫

諸脉數動微弱並不可發汗發汗則小便反難
胞中反乾胃燥而煩其形相象根本異源

脉濡而弱弱反在關濡反在巔弦反在上微反
在下弦爲陽運微爲陰寒上實下虛意欲得溫

微弦爲虛不可發汗發汗則寒慄不能自還

欬者則劇數吐涎沫咽中必乾小便不利心中
飢煩晡時而發其形似瘡有寒無熱虛而寒慄
欬而發汗蹇而苦滿腹中復堅

厥而脈緊不可發汗發汗則聲亂咽嘶舌萎其
聲不能出

諸逆發汗微者難愈劇者言亂睛眩者死命將
難治

太陽病得之八九日如瘧狀發熱而惡寒熱多
寒少其人不嘔清便續自可一日再三發其脉
微而惡寒者此爲陰陽俱虛不可復發其汗
太陽病發熱惡寒寒多熱少脉微弱則無陽也
不可復發其汗

咽喉乾燥者不可發其汗

亡血家不可攻其表汗出則寒慄而振

衄家不可攻其表汗出則額陷脉上促急而緊

直視而不能眴不得眠

汗家重發其汗必恍惚心亂小便已陰疼可與
禹餘糧圓

淋家不可發汗發汗必便血

瘡家雖身疼痛不可攻其表汗出則瘥

冬溫發其汗必吐利口中爛生瘡

下利清穀不可攻其表汗出必脹滿

欬而小便利若失小便者不可攻其表汗出則

厥逆冷

傷寒一二日至四五日厥者必發熱前厥者後必熱厥深熱亦深厥微熱亦微熱應下之而發其汗者必口傷爛赤

傷寒頭痛翕翕發熱形象中風常微汗出又自嘔者下之益煩懊憹如飢發汗卽致瘕身強難以屈伸熏之卽發黃不得小便灸卽發欬唾

傷寒其脉弦細頭痛發熱此爲屬少陽少陽不

可發其汗

中風往來寒熱傷寒五六日已後胸脇苦滿嘿
嘿不欲食飲煩心喜嘔或胸中煩而不嘔或渴
或腹中痛或脇下痞堅或心中悸小便不利或
不渴外有微熱或欬屬小柴胡湯證

傷寒四五日身體熱惡風頸項強脇下滿手足
溫而渴屬小柴胡湯

傷寒六七日發熱微惡風支節煩疼微嘔心下

支結外證未去者屬柴胡桂枝湯證

太陽病發其汗因致瘧

太陽與少陽併病頭項強痛或眩時如結胸心下痞而堅不可發其汗

少陰病欬而下利譌語是爲被火氣劫故也小便必難以強責少陰汗也

少陰病但厥無汗而強發之必動其血未知從何道出或從口鼻或從耳目出是爲下厥上竭

爲難治

傷寒有五皆熱病之類也同病異名同脉異經
病雖俱傷于風其人自有固疾則不得同法其
人素傷風因復傷于熱風熱相薄則發風溫四
肢不收頭痛身熱常汗出不解治在少陰厥陰
不可發汗汗出譫語獨語內煩燥擾不得臥善
驚目亂無精治之復發其汗如此者醫殺之也
傷寒溼溫其人常傷于溼因而中暍溼熱相薄

則發溼溫病若兩脛逆冷腹滿又胸頭目痛苦
妄言治在足太陰不可發汗汗出必不能言耳
聾不知痛所在身青面色變名曰重暍如此者
醫殺之也

辨可發汗病形證治第十四

凡發汗欲令手足俱周皦皦然一時間許益佳
不可令如水流漓若病不解當重發汗汗多必
亡陽陽虛不得重發汗也

凡服湯藥發汗中病便止不必盡劑也

凡云可發汗無湯者圓散亦可要以汗出爲解然不如湯隨證良驗

大法春夏宜發汗

太陽病外證未解脉浮弱者當以汗解宜桂枝湯

太陽病脉浮而數者可發汗宜桂枝湯一云麻黃湯

陽明病其脉遲汗出多而微惡寒表爲未解可發其汗宜桂枝湯

夫病脉浮大問病者言但堅耳設利者爲虛大逆堅爲實汗出而解何以故脉浮當以汗解

傷寒其脉不弦緊而弱弱者必渴被火必譫語弱者發熱脉浮解之當汗出愈

病者煩熱汗出則解復如瘧狀日晡發熱者屬陽明脉浮虛者當發其汗宜桂枝湯

病常自汗出。此爲營氣與衛氣不和也。營行脉中，爲陰主內；衛行脉外，爲陽主外。復發其汗，衛和則愈。宜桂枝湯。

病人藏無他病，時發熱自汗出不愈，此衛氣不和也。先其時發汗，則愈。宜桂枝湯。

脉浮而緊，浮則爲風，緊則爲寒。風則傷衛，寒則傷營。營衛俱病，骨節煩疼，可發其汗。宜麻黃湯。太陽病不解，熱結胸脇，其人如狂，血必自下。

者卽愈其外未解尙未可攻當先解其外宜桂枝湯

太陽病下之微喘者表未解故也宜麻黃湯又云桂枝加厚朴杏子湯

傷寒脉浮緊不發其汗因衄宜麻黃湯

陽明病脉浮無汗其人必喘發其汗卽愈宜麻黃湯

太陽病脉浮者可發其汗宜桂枝湯

太陽脉浮緊。無汗而發熱。其身疼痛。八九日不解。其表候續在。此當發其汗。服湯藥微除發煩。目眩。劇者必衄。衄乃解。所以然者。陽氣重故也。宜麻黃湯。

傷寒不大便六七日。頭痛有熱者。不可與承氣湯。其小便清者。此爲不在裏。仍在表也。當發其汗。頭痛者必衄。宜桂枝湯。

下利腹脹滿。身體疼痛。先溫其裏。乃攻其表。宜

桂枝湯

下利後身體疼痛清便自調急當救表宜桂枝湯

太陽病頭痛發熱汗出惡風屬桂枝湯證

太陽中風脉陽浮而陰濡弱浮者熱自發濡弱者汗自出嗇嗇惡寒淅淅惡風翕翕發熱鼻鳴乾嘔屬桂枝湯

太陽病發熱汗出此爲營弱衛強故使汗出欲

救邪風屬桂枝湯證。

太陽病下之其氣上撞屬桂枝湯證。

太陽病初服桂枝湯而反煩不解者當先刺風池風府乃與桂枝湯則愈。

燒針令其汗針處被寒核起而赤者必發黃豚氣從小腹上撞心者灸其核上各一壯却與桂枝加桂湯。

太陽病項背強几几反汗出惡風者屬桂枝加

葛根湯

太陽病項背強几几無汗惡風屬葛根湯

太陽與陽明合病而自利屬葛根湯證不利但嘔者屬葛根加半夏湯證

太陽病桂枝證而反下之遂利不止其脉促表未解喘而汗出屬葛根黃芩黃連湯證

太陽病頭痛發熱身體疼腰痛骨節疼痛惡風無汗而喘屬麻黃湯證

太陽與陽明合病喘而胸滿者不可下也屬麻黃湯證

太陽中風脉浮緊發熱惡寒身體疼痛不汗出而煩躁頭痛屬大青龍湯證脉微弱汗出惡風不可服之服之則厥筋惕肉瞤此爲逆也

陽明中風脉弦浮大而短氣腹滿脇下及心痛久按之氣不通鼻乾不得汗其人嗜臥一身及目悉黃小便難有潮熱時時噦耳前後腫刺之

小差其外不解病過十日脉續浮與柴胡湯但浮無餘證與麻黃湯不溺腹滿加噦者不治

太陽病十日已去其脉浮細嗜臥此爲外解設胸滿脇痛與小柴胡湯脉浮麻黃湯

傷寒脉浮緩其身不疼但重乍有輕時無少陰證者可與大青龍湯發之

傷寒心下有水氣欬而微喘發熱不渴服湯已而渴者此爲寒去爲欲解屬小青龍湯證

少陰病得之二三日麻黃附子甘草湯微發汗
脈浮小便不利微熱消渴可與五苓散利小便
發汗

辨不可吐病形證治第十五

太陽病當惡寒而發熱今自汗出反不惡寒發
熱關上脈細而數者此醫吐之故也若得病一
日二日吐之者腹中飢口不能食三日四日吐
之者不喜糜粥欲食冷食朝食暮吐此醫吐之

所致也此爲小逆

太陽病吐之但太陽病當惡寒今反不惡寒不欲近衣此爲吐之內煩也

少陰病其人飲食入口卽吐心中噤噤欲吐復不能吐始得之手足寒脉弦遲者此胸中實不可下也若膈上有寒飲乾嘔者不可吐當溫之諸四逆厥者不可吐之虛家亦然

辨可吐病形證治第十六

凡服湯吐。中病便止。不必盡劑也。

大法春宜吐。

病如桂枝證。其頭不痛。項不强。寸口脉微浮。胸中痞堅。氣上撞咽喉。不得息。此爲胸有寒。當吐之。

病胃上諸實。胸中鬱鬱而痛。不能食欲。使人按之。而反有涎沫。唾下利日十餘行。其脉反遲。寸口微滑。此可吐之。吐之利則止。

少陰病其人飲食入則吐心中噤噤欲吐復不能吐當遂吐之

宿食在上脘當吐之

病者手足逆冷脉乍緊邪結在胸中心下滿而煩飢不能食病在胸中當吐之

辨不可下病形證治第十七

脉濡而弱濡反在關弱反在巔微反在上澁反在下微則陽氣不足澁則無血陽氣反微中風

汗出而反躁煩。澁則無血。厥而且寒。陽微不可下。下之則心下痞堅。

動氣在右不可下。下之則津液內竭。咽燥鼻乾。頭眩心悸。

動氣在左不可下。下之則腹裏拘急。食不下。動氣反劇。身雖有熱。臥反欲蹠。

動氣在上不可下。下之則掌握熱。煩身上浮冷。熱汗自泄。欲水自灌。

動氣在下不可下下之則腹滿卒起頭眩食則
下清穀心下痞堅

咽中閉塞不可下下之則上輕下重水漿不下
臥則欲蹠身體急痛復下利日數十行

諸外實者不可下下之則發微熱亡脉則厥當
臍握熱

諸虛者不可下下之則渴引水者易愈惡水者

劇

脉濡而弱。弱反在關。濡反在巔。弦反在上。微反在下。弦爲陽運。微爲陰寒。上實下虛。意欲得溫。微弦爲虛。虛者不可下。微則爲欬。欬則吐涎沫。下之欬則止而利。不休胸中如蟲齧。粥入則出。小便不利。兩脇拘急。喘息爲難。脰背相牽。臂則不仁。極寒反汗出。軀冷若冰。眼睛不慧。語言不休。穀氣多入。則爲除中。口雖欲言。舌不得前。脉濡而弱。弱反在關。濡反在巔。浮反在上。數反

在下浮則爲陽虛數則爲無血浮則爲虛數則
生熱浮則爲虛自汗而惡寒數則爲痛振而寒
慄微弱在關心下爲急喘汗不得呼吸呼吸之
中痛在於脇振寒相搏其形如癰醫反下之令
脉急數發熱狂走見鬼心下爲痞小便淋漓小
腹甚堅小便血也

脉濡而緊濡則陽氣微緊則營中寒陽微衛中
風發熱而惡寒營緊胃氣冷微嘔心內煩醫以

爲大熱。解肌發其汗。亡陽虛煩躁。心下苦痞堅。
表裏俱虛竭。卒起而頭眩。客熱在皮膚。悵怏不
得眠。不知胃氣冷。緊寒在關元。技巧無所施。汲
水灌其身。客熱應時罷。慄慄而振寒。重被而覆
之。汗出而冒。顛體惕而又振。小便爲微難。寒氣
因水發。清穀不容間。嘔吐反腸出。顛倒不得安。
手足爲微逆。身冷而內煩。遲欲從後救。安可復
追還。

脉浮而大浮爲氣實大爲血虛血虛爲無陰孤陽獨下陰部小便難胞中虛今反小便利而大汗出法應衛家當微今反更實津液四射營竭血盡乾煩不得眠血薄肉消而成暴液醫復以毒藥攻其胃此爲重虛客陽去有期必下如汚泥而死

趺陽脉遲而緩胃氣如經也趺陽脉浮而數浮則傷胃數則動脾此非本病醫特下之所爲也

營衛內陷。其數先微。脉反但浮。其人必大便堅。
氣噫而除。何以言之。脾脉本緩。今數脉動。脾其
數先微。故知脾氣不治。大便堅。氣噫而除。今脉
反浮。其數改微。邪氣獨留心中。則飢邪熱不殺。
穀潮熱發渴。數脉當遲緩。脉因前後度數如法。
病者則飢數脉不時則生惡瘡也。

脉數者久數不止。止則邪結。血氣不能復正。氣
却結於藏。故邪氣浮之。與皮毛相得。脉數者不

可下下之必煩利不止

少陰病脉微不可發其汗無陽故也陽已虛尺中弱澁者復不可下之

脉浮大宜發汗醫反下之此爲大逆

脉浮而大心下反堅有熱屬藏者攻之不令發汗屬府者不令洩數洩數則大便堅汗多卽熱愈汗少則便難脉遲尙未可攻

二陽併病太陽初得病時發其汗汗先出復不

徹。因轉屬陽明。欲自汗。不惡寒。若太陽證不罷。不可下。下之爲逆。

結胃證。其脉浮大。不可下。下之卽死。

太陽與陽明合病。喘而胸滿。不可下。下之卽死。
太陽與少陽合病。心下痞堅。頭項強而眩。勿下之。

諸四逆厥者。不可下之。虛家亦然。

病欲吐者。不可下之。

太陽病有外證未解不可下下之爲逆

夫病發于陽而反下之熱入因作結胸發于陰而反下之因作痞

脉浮緊而下之緊反入裏則作痞

夫病陽多者熱下之則堅

本虛攻其熱必噦

無陽陰強而堅下之必清穀而腹滿

太陰之爲病腹滿而吐食不下下之益甚腹時

自痛胸下痞堅

厥陰之爲病消渴氣上撞心中疼痛熱飢而不欲食甚者則欲吐下之不肯止

少陰病其人飲食入則吐心中噍噍欲吐復不能吐始得之手足寒脉遲此胸中實不可下之傷寒五六日不結胸腹濡脉虛復厥者不可下下之亡血死

傷寒發熱但頭痛微汗出發其汗則不識人熏

之則喘不得小便心腹滿下之短氣而腹脹小便難頭痛背強加溫針則必衄

傷寒其脉陰陽俱緊惡寒發熱則脉欲厥厥者脉初來大漸漸小更來漸大是其候也惡寒甚者翕翕汗出喉中痛熱多者目赤睛不慧醫復發之咽中則傷若復下之則兩目閉寒多清穀熱多便膿血熏之則發黃熨之則咽燥小便利者可救難者危殆

傷寒發熱口中勃勃氣出頭痛目黃衄不可制
貪水者必嘔惡水者厥下之咽中生瘡假令手
足溫者下重便膿血頭痛目黃者下之目閉貪
水者下之其脉必厥其聲嚶咽喉塞發其汗則
戰慄陰陽俱虛惡水者下之裏冷不嗜食大便
完穀出發其汗口中傷舌上胎滑煩躁脉數實
不大便六七日後必便血發其汗小便卽自利
得病六七日小便少者雖不大便但頭堅後溲

未必其成堅攻之必溘當須小便利定堅乃可攻之

藏結者無陽證不往來寒熱其人反靜舌上胎滑者不可攻也

傷寒嘔多雖有陽明證不可攻之

陽明病潮熱微堅可與承氣湯不堅勿與之若不大便六七日恐有燥屎欲知之法可與小承氣湯若腹中轉矢氣者爲有燥屎乃可攻之若

不轉矢氣者此爲但頭堅後溏不可攻之攻之必腹滿不能食欲飲水者必噦其後發熱者必復堅以小承氣湯和之若不轉矢氣者慎不可攻之

陽明病面合赤色者不可攻之必發熱色黃者小便不利也

陽明病當心下堅滿不可攻之攻之利遂不止者死止者生

陽明病自汗出若發其汗小便自利此爲津液
內竭雖堅不可攻之當須自欲大便宜蜜煎導
而通之若土瓜根猪膽汁皆可以導

傷寒中風醫反下之其人下利日數十行穀不
化腹中雷鳴心下痞堅而滿乾嘔而煩不能得
安醫見心下痞爲病不盡復重下之其痞益甚
此非結熱但以胃中虛客氣上逆故使之堅屬
甘草瀉心湯證

下利其脉浮大此爲虛以強下之故也設脉浮革因爾腸鳴屬當歸四逆湯證

辨可下病形證治第十八

凡服下藥用湯勝圓中病卽止不必盡劑

大法秋宜下

陽明病發熱汗多者急下之宜承氣湯

一云大柴胡湯

少陰病得之二三日口燥咽乾急下之宜承氣

湯

少陰病六七日腹滿不大便者急下之宜承氣湯

少陰病下利清水色青者心下必痛口乾燥者可下之宜大柴胡湯承氣湯

下利三部脉皆平一云浮按其心下堅者可下之

宜承氣湯

下利脉遲而滑者內實也利未欲止當下之宜

承氣湯

陽明與少陽合病而利不負者爲順負者失也
互相尅賊爲負

脉滑而數者有宿食也當下之宜大柴胡湯承
氣湯

問曰人病有宿食何以別之師曰寸口脉浮大
按之反澁尺中亦微而澁故知有宿食當下之
宜承氣湯

下利不欲食者有宿食也當下之宜承氣湯

下利已瘥至其年月日時復發者此爲病不盡故也復當下之宜承氣湯

下利脉反滑當有所去下之乃愈宜承氣湯

病腹中滿痛者爲實當下之宜大柴胡湯

腹滿不減減不足言當下之宜大柴胡湯承氣湯

傷寒後脉沉實沉實者下之解宜大柴胡湯

傷寒六七日目不了了睛不和無表裏證大便秘

難微熱者。此爲實。急下之。宜大柴胡湯。承氣湯。
太陽病未解。其脉陰陽俱停。必先振汗出而解。
但陽脉微者。先汗之而解。陰脉微者。先下之而
解。宜承氣湯。一云大柴胡湯。

脉雙弦而遲。心下堅。脉大而堅者。陽中有陰也。
可下之。宜承氣湯。

結胃者。項亦強。如柔痙狀。下之。卽和。宜陷胸圓。
病者無表裏證。發熱七八日。脉雖浮數。可下之。

金匱要略卷之五
三
宜大柴胡湯

太陽病六七日表證續在其脉微沉反不結胸
其人發狂此熱在下焦小腹當堅而滿小便自
利者下血乃愈所以然者太陽隨經瘀熱在裏
故也屬抵當湯證

太陽病身黃其脉沉結小腹堅小便不利爲無
血也小便自利其人如狂者血證諦也屬抵當
湯

傷寒有熱而小腹滿應小便不利今反利者爲有血也當下之宜抵當圓

陽明病發熱而汗出此爲熱越不能發黃也但頭汗出其身無有齊頸而還小便不利渴飲水漿此爲瘀熱在裏身必發黃屬茵陳蒿湯證

陽明證其人喜忘必有畜血所以然者本有久瘀血故令喜忘尿雖堅大便必黑屬抵當證

汗出而譫語者有燥屎在胃中此爲風也過經

乃可下之下之若早譏語而亂以表虛裏實故也下之則愈宜大柴胡湯承氣湯

病者煩熱得汗出卽解復如瘧狀日晡所發熱者屬陽明脉實者當下之宜大柴胡湯承氣湯陽明病譏語有潮熱而反不能食者必有燥屎五六枚若能食者但堅耳屬承氣湯

下利而譏語者爲有燥屎也屬承氣湯

得病二三日脉弱無太陽柴胡證而煩心下堅

至四日雖能食以承氣湯少與微和之令小安至六日與承氣湯一升不大便六七日小便少者雖不能食但頭堅後溏未定其成堅攻之必溏當須小便利定堅乃可攻之宜大柴胡湯承氣湯

太陽中風下利嘔逆表解乃可攻之其人漐漐汗出發作有時頭痛心下痞堅滿引脇下痛嘔即短氣不惡寒此爲表解裏未和屬十棗湯證

太陽病不解熱結膀胱其人如狂血自下下者
卽愈其外不解尙未可攻當先解其外外解小
腹急結者乃可攻之宜桃仁承氣湯

傷寒七八日身黃如橘子色小便不利小腹微
滿屬茵陳湯證

傷寒發熱汗出不解後心中痞堅嘔而利者屬
大柴胡湯證

傷寒十餘日熱結在裏復往來寒熱屬大柴胡

湯證但結胸無大熱此爲水結在胸脇頭微汗出屬大陷胸湯證

傷寒六七日結胸熱實其脉沉緊心下痛按之如石堅屬大陷胸湯證

陽明病其人汗多津液外出胃中燥大便必堅堅者則譫語屬承氣湯證

陽明病不吐下而心煩者屬承氣湯證

陽明病其脉遲雖汗出而不惡寒其體必重短

氣腹滿而喘有潮熱如此者其外爲解可攻其裏若手足濇然汗出此大便秘已堅承氣湯主之其熱不潮腹大滿而不大便秘者屬小承氣湯微和其胃氣勿令至大下

陽明病潮熱微堅可與承氣湯不堅勿與之言不大便秘六七日恐有燥屎欲知之法可與小承氣湯若腹中轉矢氣者爲有燥屎乃可攻之陽明病譫語妄言發潮熱其脉滑疾如此者承

氣湯主之。因與承氣湯一升。腹中轉矢氣者。復與一升。如不轉矢氣者。勿與之。明日又不大便。脉反微瀼。此爲裏虛。爲難治。不可復與承氣湯。大下後六七日。不大便。煩不解。腹滿痛。此有燥屎。所以然者。本有宿食故也。屬承氣湯證。病者小便不利。大便乍難乍易。時有微熱。怫鬱不能臥。有燥屎故也。屬承氣湯證。

二陽併病。太陽證罷。但發潮熱。手足漿漿汗出。

大便難而讞語者下之卽愈宜承氣湯

金匱玉函經卷第五

終

金匱玉函經卷第六

辨發汗吐下後病形證治第十九

發汗後水藥不得入口爲逆

發汗後飲水多者必喘以水灌之亦喘

未持脉時病人叉手自冒心師因教試令欬而不卽欬者此必兩耳無所聞也所以然者重發汗虛故也

發汗後身熱又重發其汗胸中虛冷必反吐也

二陽併病太陽初得病時發其汗汗先出復不
徹因轉屬陽明續自微汗出不惡寒若太陽證
不罷者不可下之下之爲逆如此者可小發其
汗設面色緣緣正赤者陽氣怫鬱在表當解之
熏之若發汗不大徹不足言陽氣怫鬱不得越
當汗而不汗其人燥煩不知痛處乍在腹中乍
在四肢按之不可得其人短氣但坐汗出而不
徹故也更發其汗卽愈何以知其汗出不徹以

脉澁故知之

陽明病本自汗出醫復重發其汗病已瘥其人微煩不了了此大便堅也以亡津液胃中燥故令其堅當問小便日幾行若本日三兩行今日再行者故知大便不久出今爲小便數少津液當還入胃中故知必當大便也

大下後發汗其人小便不利此亡津液勿治之其小便利必自愈

金匱要略卷之二
病人脉數數爲熱當消穀引食而反吐者以醫發其汗陽氣微隔氣虛脉則爲數數爲客熱不能消穀胃中虛冷故吐也

病者有寒復發其汗胃中冷必吐衄

傷寒發其汗身目爲黃所以然者寒濕相搏在裏不解故也

發汗後重發其汗亡陽譫語其脉反和者不死傷寒發汗已解半日許復煩其脉浮數可復發

其汗宜桂枝湯

傷寒大下後復發其汗心下痞惡寒者表未解也不可攻其痞當先解表表解乃可攻其痞解表宜桂枝湯攻痞宜大黃瀉心湯

發其汗反躁無表證者宜大柴胡湯

服桂枝湯大汗出若脉但洪大者與桂枝湯若其形如瘧狀一日再發汗出便解與桂枝二麻黃一湯

服桂枝湯大汗出大煩渴不解若脉洪大屬白
虎湯證

太陽病發其汗遂漏不止其人惡風小便難四
肢微急難以屈伸屬桂枝加附子湯證

發汗不解腹滿痛者急下之宜承氣湯一云大
柴胡湯

發汗後身體疼痛其脉沉遲屬桂枝加芍藥生
薑人參湯證

太陽病發其汗而不解其人發熱心下悸頭眩身瞤而動振振欲僻地者屬玄武湯證

發汗後其人臍下悸欲作賁豚屬茯苓桂枝甘草大棗湯證

發汗過多以後其人叉手自冒心心下悸而欲得按之屬桂枝甘草湯證

發汗後腹脹滿屬厚朴生姜半夏甘草人參湯發其汗不解而反惡寒者虛故也屬甘草附子

湯證

不惡寒但熱者實也當和其胃氣屬小承氣湯
太陽病發汗後大汗出胃中乾燥煩不得眠其
人欲飲水當稍飲之令胃中和即愈

太陽病三日發其汗不解蒸蒸發熱者屬調胃
承氣湯

傷寒脈浮自汗出小便數頗復微惡寒而腳攣
急反與桂枝湯欲攻其表得之便厥咽燥乾煩

吐逆作甘草乾薑湯以復其陽厥愈足溫更作
芍藥甘草湯與之其脚卽伸而胃氣不和譌語
可與承氣湯重發汗復加燒針者屬四逆湯
傷寒汗出解之後胃中不和心下痞堅乾噫食
臭脇下有水氣腹中雷鳴而利屬生薑瀉心湯
傷寒五六日其人已發汗而復下之胸脇滿微
結小便不利渴而不嘔但頭汗出往來寒熱而
煩此爲未解柴胡桂枝乾薑湯證

陽明病汗出若復發其汗小便自利此爲津液
內竭雖堅不可攻之當須自欲大便宜蜜煎導
而通之若土瓜根猪膽汁皆可以導

凡病若發汗若吐若下若亡血無津液而陰陽
自和者必自愈

傷寒大吐下之極虛復極汗者其人外氣怫鬱
復與之水以發其汗因得噦所以然者胃中寒
冷故也

傷寒吐下發汗後心下逆滿氣上撞胸起則頭眩其脉沉緊發汗卽動經身爲振搖屬茯苓桂枝白朮甘草湯證

發汗吐下以後不解煩躁屬茯苓四逆湯證

發汗吐下後虛煩不得眠劇者反覆顛倒心中懊憹屬梔子湯若少氣梔子甘草湯若嘔者梔子生姜湯證

傷寒下後煩而腹滿臥起不安屬梔子厚朴湯

傷寒吐下發汗虛煩脉甚微八九日心下痞堅
脇下痛氣上衝咽喉眩冒經脉動惕者久而成
痿

傷寒發汗吐下解後心下痞堅噫氣不除者屬
旋覆代赭湯證

太陽病吐下發汗後而微煩小便數大便因堅
可與小承氣湯和之則愈

太陽病不解轉入少陽脇下堅滿乾嘔不能食

往來寒熱。尚未吐下。其脈沉緊。可與小柴胡湯。
若已吐下。發汗溫針。柴胡湯證罷。此爲壞病。知
犯何逆。以法治之。

吐利發汗。其人脈平而小。煩此新虛。不勝穀氣。
故也。

下已。後發其汗。必振寒。又其脈微細。所以然者。
內外俱虛故也。

發汗若下之。煩熱胸中塞者。屬梔子湯證。

下以後復發其汗者則晝日煩躁不眠夜而安
靜不嘔不渴而無表證其脉沉微身無大熱屬
附子乾薑湯證

大汗出若大下利厥者屬四逆湯證

太陽病先下而不愈因復發其汗表裏俱虛其
人因冒冒家當汗出愈所以然者汗出表和故
也表和故下之

太陽病先發汗不解而下之其脉浮不愈浮爲

在外。而反下之故不愈。今脉浮故在外。當解其
外則愈。宜桂枝湯。

傷寒六七日發熱微惡寒支節煩疼微嘔心下
支結外證未去者屬柴胡桂枝湯證。

發汗多亡陽狂語者不可下可與柴胡桂枝湯
和其營衛以通津液後自愈。

太陽病醫發其汗遂發熱惡寒復下之則心下
痞堅表裏俱虛陰陽氣併竭無陽則陰獨復加。

火針因而煩而色青黃膚瞶如此者爲難治今
色微黃手足溫者易愈

夫病陽多熱下之則堅汗出多極發其汗亦堅
太陽病重發汗而復下之不大便五六日舌上
燥而渴日晡所小有潮熱從心下至小腹堅滿
而痛不可近屬大陷胸湯證

三陽合病腹滿身重難以轉側口不仁而垢譫
語遺溺發汗則譫語下之則額上生汗手足厥

冷自汗屬白虎湯證。

傷寒服湯藥而下利不止心下痞服瀉心湯已復以他藥下之利不止醫以理中與之利益甚理中者理中焦此利在下焦與赤石脂禹餘糧湯若不止者當利其小便

傷寒醫以圓藥下之身熱不去微煩屬梔子乾姜湯證。

傷寒中風柴胡湯證具而以他藥下之若柴胡

湯證不罷復與柴胡湯必蒸蒸而振却發汗出而解此雖已下不爲逆也若心下滿而堅痛者此爲結胸屬大陷胸湯證若但滿而不痛者此爲痞柴胡不復中與也屬半夏瀉心湯證

得病六七日脉遲浮弱惡風寒手足溫醫再三下之不能多其人脇下滿面目及身黃頭項強小便難與柴胡湯後必下重渴飲水而嘔柴胡不復中與也食穀則噦

病者無表裏證。發熱七八日。脉雖浮數者。可下之。假令已下。脉數不解。而合熱則消穀善飢。至六七日不大便者。有瘀血。屬抵當湯證。若脉數不解而下不止。必挾熱便膿血。

脉浮數法當汗出而愈。而下之則體重心悸者。不可發其汗。當自汗出而解。所以然者。尺中脉微。此裏虛。須表裏實。津液和。自汗出愈。

陽明病。其脉浮緊。咽乾口苦。腹滿而喘。發熱汗

出而不惡寒反偏惡熱其身體重發其汗卽燥
心憤憤而反譏語加溫針必怵惕煩躁不得眠
下之卽胃中空虛客氣動膈心中懊懷舌上胎
者屬梔子湯證若渴欲飲水口乾舌燥者與白
虎湯若脉浮發熱渴欲飲水小便不利與猪苓
湯

發汗已後不可更與桂枝湯汗出而喘無大熱
屬麻黃杏子石膏甘草湯證

病人脉微而濇者此爲醫所病也大發其汗又數大下之其人亡血病當惡寒而發熱無休止時夏月盛熱而欲着複衣冬月盛寒而欲裸其體所以然者陽微卽惡寒陰弱卽發熱此醫發其汗使陽氣微又大下之令陰氣弱五月之時陽氣在表胃中虛冷陽氣內微不能勝冷故欲着複衣十一月之時陽氣在裏胃中煩熱陰氣內弱不能勝熱故欲裸其體又陰脉遲澁故知

亡血也

傷寒吐後腹滿者屬承氣湯證

傷寒本自寒下醫復吐下之寒格更逆吐食入
卽出屬乾薑黃芩黃連人參湯證

傷寒吐下七八日不解熱結在裏表裏俱熱時
時惡風大渴舌上乾燥而煩欲飲水數升屬白
虎湯證

傷寒吐下後未解不大便五六日至十餘日其

人日晡所發潮熱。不惡寒。獨語如見鬼神之狀。若劇者發則不識人。循衣妄撮。怵惕不安。微喘直視。脉弦者生。濇者死。微者但發熱譫語屬承氣湯證。若下者勿復服。

太陽病過經十餘日。心下噎噎欲吐而胸中痛。大便反溇。其腹微滿。鬱鬱微煩。先時自極吐下者。可與承氣湯。不爾者不可與。欲嘔胸中痛微溇者。此非柴胡湯證。以嘔故知極吐下也。

太陽病下之微喘者表未解故也屬桂枝湯證
一云麻黃湯證

太陽病脉浮而動數浮則爲風數則爲熱動則
爲痛數則爲虛頭痛發熱微盜汗出而反惡寒
其表未解醫反下之動數則遲頭痛則眩胃中
空虛客氣動膈短氣躁煩心中懊憹陽氣內陷
心下因堅則爲結胸屬大陷胸湯證若不結胸
但頭汗出其餘無有齊頸而還小便不利身必

發黃

太陽病下之脉促不結胸者此爲欲解其脉浮者必結胸其脉緊者必咽痛其脉絃者必兩脇拘急其脉細而數者頭痛未止其脉沉而滑者必欲嘔脉沉而滑者挾熱利其脉浮而滑者必下血

太陽病下之其脉促胸滿者屬桂枝去芍藥湯若微惡寒桂枝去芍藥加附子湯證

太陽病桂枝證醫反下之遂利不止其脉促表未解喘而汗出屬葛根黃芩黃連湯證

太陽病醫反下之因腹滿時痛爲屬太陰屬桂枝加芍藥湯證其大實痛屬桂枝加大黃湯證
太陽病下之其氣上衝可與桂枝湯不上衝者不可與之也

太陽病二三日終不能臥但欲起者心下必結其脉微弱者此本寒也而反下之利止者必結

胸未止者，四五日復重下之，此挾熱利也。

太陽病，外證未除，而數下之，遂挾熱利而止心下痞堅，表裏不解，屬桂枝人參湯證。

大下以後，不可更行桂枝湯，汗出而喘，無大熱，屬麻黃杏仁石膏甘草湯證。

太陽病，五日下之，六七日不大便而堅者，屬柴胡湯證。

太陽病，過經十餘日，反再三下之後，四五日柴

胡湯證續在先與柴胡湯嘔止小安其人鬱鬱微煩者爲未解屬大柴胡湯證

傷寒八九日下之胸滿煩驚小便不利譫語一身不可轉側屬柴胡加龍骨牡蠣湯證

傷寒十三日不解胸脇滿而嘔日晡所發潮熱而微利此證當柴胡湯下之不得利今反利者故知醫以圓藥下之非其治也潮熱者實也先再服小柴胡湯以解其外後屬柴胡加芒硝湯

傷寒十三日過經而譫語。內有熱也。當以湯下之。小便利者。大便當堅而反利。其脉調和者。故知醫以圓藥下之。非其治也。自利者。其脉當微厥。今反和者。此爲內實。屬承氣湯證。

傷寒五六日。嘔而發熱。柴胡湯證具。而以他藥下之。心下滿而堅痛者。此爲結胸。屬大陷胸湯。陽明病下之。其外有熱。手足溫。不結胸。心中懊懣者。飢不能食。但頭汗出。屬梔子湯證。

陽明病下之心中懊懣而煩胃中有燥屎者可
攻其人腹微滿頭堅後溏者不可下之有燥屎
者宜承氣湯

陽明病不能食下之不解其人不能食攻其熱
必噦所以然者胃中虛冷故也

陽明病脉遲食難用飽飽卽發煩頭眩者必小
便難此欲作穀疸雖下之其腹滿卽如故耳所
以然者脉遲故也

跌陽脉微弦而如此爲強下之

下利其脉浮大此爲虛以強下之故也設脉浮革故爾腸鳴屬當歸四逆湯證

傷寒醫下之續得下利清穀不止身體疼痛急當救裏後身體疼痛清便自調急當救表救裏宜四逆湯救表宜桂枝湯

大下後五七日不大便煩不解腹痛而滿有燥屎者本有宿食故也

大下後口燥者裏虛故也

火逆下之因燒針煩躁屬桂枝甘草龍骨牡蠣湯

辨可溫病形證治第二十

大法冬宜服溫熱藥及灸

師曰病發熱頭痛脉反沉若不差身體更疼痛當救其裏宜溫藥四逆湯

下利腹滿身體疼痛先溫其裏宜四逆湯

自利不渴者屬太陰其藏有寒故也當溫之宜四逆輩

少陰病其人飲食入則吐心中噍噍欲吐復不能吐始得之手足寒脉弦遲若膈上有寒飲乾嘔者不可吐當溫之宜四逆湯

少陰病其脉沉者急當溫之宜四逆湯

下利欲食者就當溫之

下利脉遲緊爲痛未欲止者當溫之得冷者滿

而便腸垢

下利其脉浮大此爲虛以強下之故也設脉浮革因爾腸鳴當溫之與水者噦宜當歸四逆湯少陰病下利脉微澁者卽嘔汗出必數更衣反少當溫之

傷寒醫下之而續得下利清穀不止身體疼痛急當救裏宜溫之以四逆湯

諸溫之屬可與理中四逆附子湯熱藥治之

辨不可火病形證治第二十一

太陽中風以火劫發其汗邪風被火熱血氣流溢失其常度兩陽相熏灼其身發黃陽盛卽欲衄陰虛小便難陰陽俱虛竭身體卽枯燥但頭汗出齊頸而還腹滿微喘口乾咽爛或不大便久則譫語甚者至噦手足躁擾循衣摸牀小便利者其人可治

太陽病醫發其汗遂發熱惡寒復下之則心下

痞此表裏俱虛陰陽氣併竭無陽則陰獨復加
火針因而煩面色青黃膚瞶者難治今色微黃
手足溫者愈

傷寒加溫鍼必驚

陽脉浮陰脉弱者則血虛血虛則筋惕其脉沉
者營氣微也其脉浮而汗出如流珠者衛氣衰
也營氣微者加燒針血留不行更發熱而煩躁
也

傷寒脉浮。醫以火迫之。亡陽驚狂。臥起不安。屬桂枝去芍藥加蜀漆龍骨牡蠣救逆湯。

問曰得病十五六日。身體黃。下利。狂欲走。師脉之言當清血。如脉肝乃愈。後如師言何以知之。師曰寸口脉陽浮陰濡而弱。陽浮則爲風。陰濡弱爲少血。浮虛受風。少血發熱。風則微寒。灑淅項強。頭眩。醫加火熏鬱令汗出。惡寒遂甚。客熱因火而發。怫鬱蒸肌膚。身目爲黃。小便微難短。

氣從鼻出血而復下之胃無津液泄利遂不止
熱瘀在膀胱畜結成積聚狀如豚肝當下未下
心亂迷憤狂走赴水不能自制畜血若去目明
心了此皆醫爲無他禍患微難得愈劇者不治
傷寒其脉不弦緊而弱弱者必渴被火必譫語
太陽病以火熏之不得汗其人必躁到經不解
必清血

陽明病被火額上微汗出而小便不利必發黃

陽明病其脉浮緊咽乾口苦腹滿而喘發熱汗出而不惡寒反惡熱其身體重發其汗卽躁心憤憤而反譫語加溫針者必怵惕又煩躁不得眠。

少陰病欬而下利譫語是爲被火氣劫故也小便必難爲強責少陰汗也。

太陽病二日而反燒瓦熨其背大汗出火熱入胃胃中水竭燥煩必發譫語十餘日振而反汗

出者此爲欲解其汗從腰以下不得汗其人欲小便不得反嘔欲失溲足下惡風大便堅者小便當數而反不數及多便已其頭必卓然而痛其人足心必熱穀氣從下流故也

風溫爲病脉陰陽俱浮自汗出身重多眠鼻息必鼾語言難出若被火者微發黃色劇則如驚癇時癰瘕若火熏之一逆尙引日再逆促命期火逆下之因燒針煩躁者桂枝甘草龍骨牡蠣

湯主之

傷寒頭痛翕翕發熱形象中風常微汗出自嘔者熏之則發黃不得小便

傷寒發熱頭痛微汗出熏之則喘加溫鍼則必
衄

傷寒脉陰陽俱緊惡寒發熱則脉欲厥厥者脉初來大漸漸小更來漸漸大是其候也若熏之則發黃熨之則咽燥小便利者可救難者危殆

辨可火病形證治第二十二

二陽併病太陽初得病時發其汗汗先出不徹因轉屬陽明續自微汗出不惡寒若太陽病證不罷者不可下可小發其汗設面色緣緣正赤者陽氣怫鬱在表不得越當解之熏之當汗而不汗其人躁煩不知痛處乍在腹中乍在四肢按之不可得其人短氣但坐以汗出不徹故也更發其汗則愈何以知汗出不徹以脉澁故知

之。

下利穀道中痛當溫之以爲宜火熬末鹽熨之
一方炙枳實熨之

辨不可灸病形證治第二十三

微數之脉慎不可灸因火爲邪則爲煩逆追虛
逐實血散脉中火氣雖微內攻有力焦骨傷筋
血難復也

脉浮當以汗解而反灸之邪無從出因火而盛

病從腰以下必重而痺此爲火逆若欲自解當
須汗出

脉浮熱甚反灸之此爲實實以虛治因火而盛
必咽燥唾血

辨可灸病形證治第二十四

燒鍼令其汗鍼處被寒核起而赤者必發賁豚
氣從小腹上衝者灸其核上各一壯與桂枝加
桂湯

少陰病得之一二日口中和其背惡寒者當灸之

少陰病其人吐利手足不逆反發熱者不死脉不至者灸其少陰七壯

少陰病下利脉微澁者卽嘔汗出必數更衣反少當溫其上灸之

諸下利皆可灸足大都五壯

一云七壯

商丘陰陵泉

皆三壯

下利手足厥冷無脉灸之主足厥陰是也灸不
溫反微喘者死

傷寒五六日脉微手足厥冷煩躁灸厥陰厥不
還者死

傷寒脉促手足厥逆可灸之灸少陰厥陰

辨不可刺病形證治第二十五

大怒無刺

大一作
新後同

已刺無怒

已一作
新下同

新內無刺

已刺無內

大勞無刺

已刺無勞

大醉無刺

已刺無醉

大飽無刺

已刺無飽

大饑無刺

已刺無饑

大渴無刺

已刺無渴

大驚無刺

無刺熇熇之熱無刺漉漉之汗無刺渾渾之脉
身熱甚陰陽皆爭者勿刺也其可刺者急取之

不汗則洩所謂勿刺者有死徵也

無刺病與脉相逆者上工刺未生其次刺未盛
其次刺已衰麤工逆此謂之伐形

辨可刺病形證治第二十六

太陽病頭痛至七日自當愈其經竟故也若欲
作再經者當鍼足陽明使經不傳則愈

太陽病初服桂枝湯而反煩不解者當先刺風
池風府却再與桂枝湯則愈

傷寒腹滿而譫語寸口脉浮而緊者此爲肝乘
脾名曰縱當刺期門

傷寒發熱啗啗惡寒其人大渴欲飲酢漿者其
腹必滿而自汗出小便利其病欲解此爲肝乘
肺名曰橫當刺期門

陽明病下血而譫語此爲熱入血室但頭汗出
者刺期門隨其實而瀉之澱然汗出則愈

婦人中風發熱惡寒經水適來得之七八日熱

除脉遲身凉胸脇下滿如結胸狀其人譫語此
爲熱入血室當刺期門隨其實而取之平病云
熱入血室無犯胃氣及上二焦與此相反豈謂
藥不謂鍼

太陽與少陽併病心下痞堅頸項強而眩當刺
大椎第一間肺俞肝俞勿下之

婦人傷寒懷娠腹滿不得大便從腰以下重如
有水氣狀懷娠七月太陰當養不養此心氣實

當刺瀉勞宮及關元小便利則愈

傷寒喉痺刺手少陰少陰在腕當小指後動脉是也鍼入三分補之

少陰病下利便膿血者可刺

辨不可水病形證治第二十七

發汗後飲水多者必喘以水灌之亦喘

傷寒吐下之極虛復極汗出者其人外氣怫鬱復與之水以發其汗因得噦者胃中寒冷故也

脉浮而遲表熱裏寒下利清穀胃中虛冷其人不能食飲水卽噦

下利其脉浮大此爲虛以強下之故也設脉浮革因爾腸鳴當溫之與水者噦

陽明病潮熱微堅可與承氣湯不堅勿與之若不大便六七日恐有燥屎欲知之法可與小承氣湯若腹中轉矢氣者此爲但頭堅後溏不可攻之攻之必腹滿不能食飲水者卽噦

病在陽當以汗解而反以水瀉之若灌之其熱却不得去須臾益煩皮上粟起意欲飲水反不渴服文蛤散不差與五苓散寒實結胸無熱證者與三物小白散

身熱皮粟不解欲引衣自覆若以水灌之洗之其熱被劫益不得去當汗而不汗卽煩假令汗出已腹中痛與芍藥三兩如上法

寸口脉浮大醫反下之此爲大逆浮卽無血大

則爲寒寒氣相搏則爲腸鳴醫乃不知而反飲水令汗大出水得寒氣冷必相搏其人必飢

寸口脉濡而弱濡卽惡寒弱則發熱濡弱相搏藏氣衰微胸中苦煩此非結熱而反搏之居水漬布冷銚貼之陽氣遂微諸府無依陰脉凝閉結在心下而不肯移胃中虛冷水漿不化小便縱通復不能多微則可救劇則寒在心下當奈何

辨可水病形證治第二十八

太陽病發汗後若大汗出胃中乾燥煩不能眠
其人欲飲水當稍飲之令胃中和則愈

厥陰病渴欲飲水者與水飲之即愈

太陽病寸口緩關上小浮尺中弱其人發熱而
汗出復惡寒欲嘔但苦心下痞者此爲下之故
也若不下其人復不惡寒而渴者爲轉屬陽明
病小便數者大便必堅不更衣十日無所苦也

金匱要略卷之六
欲飲水者與之但當如法救之宜五苓散

寸口脉洪而大數而滑洪大則營氣長滑數則胃氣實營長則陽盛怫鬱不得出胃實則堅難大便則乾燥三焦閉塞津液不通醫發其汗陽盛不周復重下之胃燥熱蓄大便遂攢小便不利營衛相搏心煩發熱兩眼如火鼻乾面赤舌燥齒黃焦故大渴過經成壞病鍼藥所不能制與水灌枯槁陽氣微散身寒溫衣覆汗出表裏

通利其病卽除形脉多不同此愈非法治但醫所當慎妄犯傷營衛

霍亂而頭痛發熱身體疼痛熱多欲飲水屬五苓散證

嘔吐而病在膈上後必思水者急與豬苓湯飲之水亦得也

論熱病陰陽交併生死證二十九

問曰溫病汗出輒復熱而脉躁疾不爲汗衰狂

言不能食病名爲何對曰病名陰陽交交者死
人所以汗出者生于穀穀生于精今邪氣交爭
於骨肉之間而得汗者是邪却而精勝也精勝
則當能食而不復熱熱者邪氣也汗者精氣也
今汗出而輒復熱者邪勝也不能食者精無俾
也汗出而熱留者壽可立而傾也夫汗出而脉
尙躁盛者死今脉不與汗相應此不能勝其病
也狂言者是失志失志者死此有三死不見一

生雖愈必死

熱病已得汗而脉尚躁盛此陰脉之極也死其得汗而脉靜者生

熱病脉尚躁盛而不得汗者此陽脉之極也死脉躁盛得汗者生

熱病已得汗而脉尚躁喘且復熱勿膚刺喘甚者死熱病陰陽交者死

熱病陽進陰退頭獨汗出死陰進陽退腰以下

至足汗出亦死陰陽俱進汗出已熱如故亦死
陰陽俱退汗出已寒慄不止鼻口氣冷亦死

熱病所謂并陰者熱病已得汗因得泄是謂并

陰故治

一作活

熱病所謂并陽者熱病已得汗脉尚躁盛大熱
汗出雖不汗出若衄是謂并陽故治

金匱玉函經卷第六

終